

En pia memoria da Marcus Levy

Il Marcus ei naschius a Glion ils 25 d'avrel sco emprem affon da Nina e Placi Levy-Schmid.



Gest in onn suenter, 1968 baghegian ils geniturs in niev dacasa a Sedrun nua ch'il Marcus astga passentar in ventireivel temps d'affonza, ensemens cun ses fargliuns Felici e René.

El medem vitg frequenta el la scola primara e reala. Tiel pli bi e liung temps sudevan las vacanzas. Duront quater stads ei il Marcus staus engaschaus sco cavrer ella Val Strem, duas da quellas ensemens cun siu frar René, nua ch'els pertgravan varga 100 cauras. Mintgadi stuevan las cauras vegnidias catschadas naven da Sedrun siado e la sera puspei engiu. Da malaura

era quei nuota mo romantic. Mo il buob ha dumignau bravurus siu pensum.

Gia duront il temps da scola ha la scienzia da construir trens da model fascinau il Marcus. L'emprema locomativa da model Deh4/4 ch'el haveva baghegjau consisteva cumpletamein ord itschal e mesirava varga in meter. Tala ha el lu era astgau presentar plein luschezia al publicum duront in'exposiziun da scola.

Terminau las scolas ha il Marcus obtenu ina piazza tier l'antierura Viasier Furca-Alpsu nua ch'el ha absolviu ils onns 1983-1987 igl emprendissadi sco mecanist el luvartori a Caschinutta. Sco perfecziunist fuva sia locomotiva construida avon entigns onns buca buna avunda ed el sedecida da crear in niev model tenor proporziun dallas mesiras originalas. A Caschinutta el luvratori dev'ins al Marcus la pusseivladad duront la sera da zambergiar vid sia nova locomativa. La construcziun impegnada en detagl ha lu pretendiu bia temps d'engaschi ed ha bia gadas stuiu vegnir messa dalla vart muort ulteriurs pensums.

Suenter igl emprendissadi ha il Marcus absolviu igl examen d'ir cun camiun e staus engaschaus tier igl aug Peter Mattli a Wassen sco manischunz. Gest duron quei temps, igl onn 1987, ei la Val d'Ursera vegnida tschaffada da grondas undaziuns. Il Marcus carava cun siu camiun d'indrez da mischedar betun pigl entir Cantun Uri.

Gia dapi in temps haveva il bab Placi da sbatter cun la sanadad ed il Marcus sto bandunar amiez il temps la recruta e serender a casa per prender cumiau. Paucs dis avon il natalezi dil giuven recrut, ils 16 d'avrel 1988 baduna il bab quest mund terrester. Ina gronda frida per l'entira famiglia. «Ussa stuein nus setener ensemens», ha il Marcus detg. Quei ha el lu era teniu en. Per la famiglia eis el dapi lu adina staus la gronda petga. Sia mumma ha el susteniu duront quei grev temps nua ch'el ha saviu e pudiu. Il temps ha medegau las plagas e la normalitat ei plauget entrada per tuts.

Suenter quei grev e drastic tschancun dalla veta tuorna il Marcus puspei anavos tier la viafier per realisar siu siemi sco locomotivist. La piazza haveva el gia obtenu avon la mort da siu bab ch'era fetg loschs da siu fegl. Tochen 1997 eis el staus engaschaus sco locomotivist substitut, pli tard sco locomotivist ed era vegnius incaricaus sco mecanist els luvratoris da Caschinutta ed Ursera.

Il Marcus fuva in mecanist incarnaui. Buca mo viafiers da model interessavan el, era ils anteriurs camiuns dalla marca Saurer sco bab manischava avon onns plaschevan ad el. Da lezs temps vegnev'e'i stediamein visitau aucziuns a Thun nua ch'ins saveva cumprar da tuttas raubas militaras, schizun in grond diember vehichels dalla marca Saurer. Posseder inagada in agen camiun, quei giaviach cursava pli e pli el tgau dil Marcus!. Il di d'ingant a Thun incumpensa el siu frar René da serender leu e cumprar in tal camiun dil tip 4MH. Igl ei il di da natalezi da Marcus che sa muort lavur buca prender part agl ingant. Detg e fatg, pils dus frars ei ina nova pissiun naschida.

Cun quei eis ei lu buca stau finiu. Entgins onns pli tard, anfla Marcus in inserat dalla vendita d'in Saurer 5DF (Allrad, Frontlenker, Kipper), la davosa nova generaziun da Saurer. Cun agid dils fargliuns eis ei stau pusseivel da cumprar ils 11 da mars, quei era il di da natalezi dil bab, il camiun mellen-grisch a Berna. Pli tard vegn schizun montau ina tschaghegna corrispondenta vidlunder. Il Marcus era fiug e flomma da siu camiun, manteneva quel e havess mai saviu dar o da maun el.

Sper la lavur ed ils hobis fuva Marcus responsabels pil manteniment dils vehichels da rumir neiv dalla viafier da vapur dil Furca. Per quei pensum haveva

el drizzau en in luvratori a Caschinutta nua ch'el era engaschaus plirs dis ed jamnas ad onn, tenor pusseivladad.

Igl onn 1997 ha il Marcus obteniu ina piazza sin siu mistregn sco locomotivist a Mustér, in schenghetg per el e sia mumma, saveva el puspei habitar a casa a Sedrun.

Igl onn 2001 empren il Marcus d'enconuscher la Susi che luvrava da lezzas uras tier la pasternaria Marcel Schmid. Igl onn 2004 maridan els dus ed ils quater affons che suondan ils proxims 5 onns portan bia ventira als consorts. Cun Silas (2005), Luca (2006), Demian (2007) e Micha (2009) era il cletg perfetgs e Marcus fuva in bien bab.

Dapi 26 onns era Marcus engaschaus tier la viafier, oz cun il num viafier Matterhorn Gottard. Igl onn 2010 mida el interpresa e lavura sco locomotivist tier la viafier Retica a Landquart. Aschia setila la famiglia a Vaz Sut nua ch'ella ha la pusseivladad da cumprar casa. Il davos affon, Janis, nescha il fevrer digl onn 2012. Ils tschun affons pertavan a bab e mumma bia plascher, denton era bia laver e truscha. Il Marcus ha impundiu cun bi carezia tut sias forzas per la famiglia. El era il punct central per ses affons.

Cun la mort ha il trappassau schau anavos ina largia ch'ins vegn buc da remplazzar. Jeu saiel buca, tgi che savess emplenir ella, denton da zatgei sun jeu perschuadius, il Marcus vegn adina ad esser cheu per ils ses, regalar ad els forza, agid e consolaziun. El vegn a cumpignar nus duront l'entira veta. Nus vegnin mai ad emblidar el e tener el en bona memoria.

«*Marcus per tut il bien che Ti has fatg per nuslein nus engraziar da tut cor.
Ti mauncas a nus e nuslein mai emblidar Tei*».

Tiu frar René

*Sag morgens mir ein gutes Wort, bevor Du gehst vom Hause fort.
Es kann soviel am Tag geschehn, wer weiss ob wir uns wiedersehn.*

Sag ein liebes Wort zur guten Nacht, wer weiss ob man noch früh erwacht.

*Das Leben ist so schnell vorbei, und dann ist es nicht einerlei,
war Du zu mir zuletzt gesagt, was Du zuletzt hast mich gefragt.*

*Drum lass ein gutes Wort das letzte sein,
bedenke - das letzte könnt es sein*